

Been Im Ju Pa Koe Ka daux

Phuk Lai Sigang Khri



Baux (2)

Khrawm Kaing Lai

Simin	Kaing Lai	Plah Lai
1.	Siyiex Nawb Buanson Piang Yakop	1
2.	Siyiex Taoh Ka Yakop Mai Ka Nyiex Ma Nawh	11
3.	Siyiex Laug Ka Mose	23
4.	Krax Kha Pa Tawx Siyiex 10 Ceu	35
5.	Poi Pasakha	45

Title: The living story from the Bible

Translated to the Wa language by:

Yex Ka Lin

Ai Sang Awng

Sam Lao Pao

I Rong Khun

Ai Kap Sin

Sai Rong Khun

Edition: First Draft


Date: 29. 7. 2016

Kheu lai riieng pa plak plih pakpeung gumlox Siyiex in kieh aik o
paox grawm mai ceu cao pa koe ka piang haktiex khawm uik
mawh buanson, riang rao ka daux
Yesux Khrit liak.

Translated from the English *Open Bible Stories*. Original work available at
unfoldingWord.org/stories

This work is licensed under the Creative Commons Attribution-
NonCommercial-ShareAlike 4.0 International License. To view a copy of this
license, visit <http://creativecommons.org/licenses/by-nc-sa/4.0/> or send a
letter to Creative Commons, PO Box 1866, Mountain View, CA 94042, USA.


Siyiex Nawb Buanson Piang Yakop



Lai Yam Jah 25:27-33, 20



Yam hoik ting kiex ra kaux, Rebekkax moh ka Yakop, lcak moh ka Esaw heue. Yakop mawh pui pa moh ti ot daux nyiex, Esaw mawh pui pa moh ti hu leue tiag heue.




Tix singaix yam kaoh Esaw khaing leue tiag nawh kied cai rhawm. Yam mhaing nawh ti ih priex pa khre Yakop, Yakop mhaing nawh tawx ara kawn Ai ka tix sivoie. Mawh kheu kied cai rhawm nawh, nawh loh ara kawn Ai ka priex pa khre Yakop heue.



Yam hoik riex ju lcak, lcak simie ti nawb buanson piang kawn tix Esaw. Viang mawh nan sivoe sang nawb buanson kah Esaw, Yakop teei tix ceep kraung Esaw mai pie ka lcak, pa mawh keeing tix heue. Rebekkax tawx Yakop ceep kraung Esaw mai ceep hak pex ka taix Yakop mai ka ngawg Yakop heue.




lcak hoik vuvi ngai ang lai chix yaox. Yakop hoek ka keeing tix mai ah tix mawh Esaw. Yakop ah nin ka lcak, “Aux hoek son sang teei buanson ka maix.” lcak nawb buanson piang Yakop mawh kheu keud nawh Yakop mawh Esaw mai kheu mhong sioe jhawm awm Esaw, mai kheu koe hauk ka taix Yakop heue.




Esaw koeng ka Yakop jao teei Yakop ara kawn Ai mai jao nawb lcak buanson ka piang Yakop. Mawh kheu nan phan lcak hoik yum, Esaw keud ti sang pah ka Yakop.




Rebekkax tawng ka krax keud Esaw. Mawh kheu nan nawh nhie Yakop to mox tix dee singai heue.



Yam ot Yakop dah dee an, nawh koe moeng 4 kaux. Nawh koe kawn simex 12 kaux mai kawn bun 1 kaux. Siyiex nawb buan piang Yakop, kieh nawh nyawm ot mhawm koe heue.



Khaix hoik lih khaing haktiex Khanan, yam hoik rheung been 20 num Yakop deeh hoek khawm viex nyiex ma tix, kawncau tix, mai sin ngao pa koe tix hoek heue.



Yakop khi rhawm kheu lhat Esaw pah ka tix heue. Mawh kheu nan Yakop ploi kawncau tix hu sivoie mai nhie kix ah nin, “Inkix mawh khawng brie pa tawx kawncau maix Yakop. Ang rheung pa mawh kawncau maix Yakop kawx sang hoek.”



Viang mawh nan kheu hoik pluat ploi Esaw phimap pa yuh Yakop, Yakop yaox ti ot yiien yawg ka daux haktiex Khanan heue. Khaix an yam hoik yum lcak, mawh Esaw mai Yakop pa sipaung heue. Gumlox sijax mukheu pa tawx Siyiex ka lcak bleeh tom hoek ka Yakop heue.

K. Deeh Thawk Theng Ka Been

1. Rebekkah moh ka pui mawx mai Icak moh ka pui mawx?
2. Esaw loh ara kawn Ai ka ceu pa tix?
3. Rebekkah nhie Yakop yuh pa tix?
4. Mawh kheu pa tix Icak nawb buan ka piang Yakop?
5. Esaw koeng ka Yakop kheu jao pa tix mai keud sang yuh pa tix ka Yakop?
6. Khaix hoik tawng Rebekkah ka krax keud Esaw, nawh nhie Yakop yuh pa tix?
7. Yam deeh hoek Yakop ka Esaw, nawh hoek yuh ka mawx?
8. Dee sidah Esaw mai Yakop ot yuh ka mawx?

Kh. Krax Pa Doh Rhawm Ka Been

1. Ara kawn Ai, mawh pa koe dee bleeh yuh ka mawx?
2. Mawh kheu pa tix Yakop pie lhien ti teei ka ara kawn Ai?
3. Ka daux been in, maix yaoux rhawm rhi Esaw mai Yakop yuh ka mawx?

G. Krax Pa Deeh Shiao Daux Ju Tix Khaing Been

1. Ka daux ju maix Siyiex tawx buanson ceu pa tix ka maix. Maix hoik pon priex buanson pa koe ngawh koe jum ka daux pa yuh ka mawx?
2. Yam jah, viang Esaw koeng ka Yakop kawx, dee sidah nawh pluat ploi ka phimap Yakop mai kiex ot yiien yawg tau heue. Ka daux ju maix son sang pon maix ti ot yiien yawg, maix caw tix yuh pa tix?

Ng. Ceu Pa Rieb Gau Ex Khaing Been In


1. Caw tix een buanson pa tawx Siyiex koe ngawh koe jum. Ang caw nu nai ka buanson pa tawx Siyiex.
2. Kheu krax pa tang rhawm miex keeing, ka daux nyiex ma chix ti lih mawh sivix ting heue.
3. Krax pa nawb keeing buanson ka piang kawn praix, mawh pa ting ceu heue.
4. Krax pluat ploi kieh ex pon pa nhim mai krax yiien yawg heue.

P. Baux Lai Pa Caw Tix Ci


Lai Yaogyaw 115:13

Mai can pui pa lhat pa graung ka Siyiex khankix, Nawh Cao nawb buanson ka kix khawm pa iak pa ting heue.


Siyiex Taoh Ka Yakop Mai Ka Nyiex Ma Nawh




Lai Yam Jah 37-50



Awm hoik rheung num, Yakop kawx hoik riex ju, nawh ploi kawn simex iak tix Yosiep hu jhak ka puxke tix pa liang yung mai pex khankix heue.




puxke Yosiep koeng ka Yosiep, mawh kheu kied moh keeing kix ka Yosiep mai jao ca maox nawh ti mawh cao kuang ka piang kix heue. Mawh kheu nan yam hu jhak Yosiep ka kix, kix giex nawh mai coh nawh ka pui pa yuh lai geu khankix heue.



Sivoe sang ing ka nyiex, kix riah kraung ceep nawh mai cub daux nham heue. Kix pie keeing tix, jhi sibex ceep Yosiep ah mawh totiag tix ceu ceu pa kiied ti ih ka Yosiep.



Pui pa yuh lai geu viex Yosiep hu ka Meung Ejiptux pa koe ka praok rawm klawng Nilax mai coh Yosiep ka Phawtiphax pa mawh cao kaing naing, pa pau ju simiang Pharaw heue. Yosiep cu nghiit ka simiang tix mai Siyiex kawx nawb buanson ka piang nawh heue.



Viang moeng simiang nyaw glaw nawh it mai tix kawx, kheu mawh nawh pui lhat ka Siyiex nawh thieng kah heue. Mawh kheu nan moeng simiang meet rhawm ka nawh mai kieh pui giex sau nawh daux thawng heue. Yam ot nawh daux thawng kawx mawh kheu kaux sijax nawh ka Siyiex, Siyiex nie baoux nawb buan piang nawh heue.



Yosiep yaox ti ot daux thawng daux pa ang tix koe krax lud loe heue. Yam an simiang Pharaw khi rhawm ka ca maox tix ra ceu. Cao sibawk kawx ang pon krai deeh bleeh ca maox Pharaw heue.



Siyiex tawx Yosiep pon paoh ti toe dee bleeh ca maox Pharaw. Mawh kheu Pharaw tawng Yosiep koe pingnya, nawh tom teei Yosiep lih khaing dauw thawng son sang toe dee bleeh ca maox nawh heue. Yosiep krai dee bleeh ca maox yuh nin, ka dauw meung Ejiptux tag sang koe pa ih pa un tom haoh tom lheu dauw aliah num, khaix an sibhawm praix tag sang lih ti koe aliah num heue.




Pharaw khaw rhawm ka Yosiep mai tawx nawh yuh simiang pa ot greem tix ra kaux tix kaux heue.




Yosiep kieh pui meung Ejiptux khrawm ti deuh pa ih pa un daux aliah num yam haoh lheu pa ih pa un heue. Yam hoek sibhawm praix aliah num, son sang yaox pui ti ih Yosiep hoe ti coh priex pa hoik khrawm tix heue.




Sibhawm praix ang joeng mawh ka daux meung Ejiptux ngie ka daux haktiex Khanan dee ot nyiex ma Yakop kawx yaox ti kham geu krax pa sibhawm praix heue.




Mawh kheu nan Yakop ploi kawn simex tix hu liag priex ih ka daux meung Ejiptux. Yam bleeh daux meung Ejiptux viang Yosiep pon ci kix mawh puxke tix kawx, kix ang lai pon ci ka Yosiep.




Khaix hoik ciied Yosiep ka kix, Yosiep ang cu kix lhat mai krai grawng mawh tix pux kix heue. Nawh ah nin ka kix, “Viang pex yuh pa ang mhawm piang aux, coh ti ih aux kawx Siyiex hoik tieh ceu pa ang mhawm lih mawh pa mhawm heue. Dux pex hoek ot tau mai aux. Aux tom chix priex ka pex son sang kub ih kub ot nyiex ma pex heue.”



Yam deeh bleeh kix ka nyiex, kix krai gawng kawn im ju Yosiep. Mawh kheu nan keeing kix, Yakop kied gaux rhawm kah heue.



Viang Yakop hoik riex ju kawx, nawh dux ti hu ot tau mai kix ka daux meung Ejiptux heue. Sivoe sang yum nawh, nawh nawb buan ka piang kawn simex tix khawm uik heue.



Gumlox sijax mukheu Siyiex hoik grum naog ka piang Abraham, Icak, Yakop mai ka piang kawn simex Yakop 12 kaux heue. Doeh ceu cat pa lih ti koe khaing kawn simex Yakop 12 kaux tom lih ti mawh ceu pui Isarilax 12 ceu heue.

K. Deeh Thawk Theng Ka Been

1. Yakop ploi Yosiep hu dee mawx mai son sang yuh pa tix?
2. Mawh kheu pa tix puxke Yosiep khankix koeng ka nawh?
3. Yosiep krai ca maox Pharaw yuh ka mawx?
4. Yam ot Yosiep daux thawng, mawh kheu pa tix Siyiex nawb buan piang nawh?
5. Yosiep kieh pui meung Ejiptux yuh pa tix?
6. Yosiep ah pa tix ka puxke tix khankix?

Kh. Krax Pa Doh Rhawm Ka Been

1. Yosiep mawh pa koe rhawm rhi pa yuh ka mawx?
2. Siyiex tieh loh Yosiep yuh ka mawx?
3. Kheu pa tix Siyiex nawb buan ka piang Yosiep?

G. Krax Pa Deeh Shiao Daux Ju Tix Khaing Been

1. Yam yaox maix krax tuktiak tukte, maix chix een rhawm ka Siyiex yuh ka mawx?
2. Awm Yosiep kaux sijax ka piang simiang tix, maix kawx caw ti koe rhawm pa yuh ka mawx ka daux kaing pa yuh tix?
3. Kheu Yosiep, nyiex ma nawh khawm uik pon buanson. Kheu maix, maix sang kieh pui pon buanson yuh ka mawx?

Ng. Ceu Pa Rieb Gau Ex Khaing Been In

1. Siyiex chix taoh ex luan khaing krax pa nu pa khawm, khawm uik.
2. Krax pa cu nghiet ex ka lox Siyiex, chix mawh buanson son ex, son nyiex ma ex mai sivie siveng ex.
3. Krax pa nawb Siyiex buanson hoek tom bleeh ka ju kawn saux kawn sex.
4. Siyiex koe krax pa chaox rhawm ka piang pui pa tawng ka Nawh mai pui pa ang tawng ka Nawh khawm uik.

P. Baux Lai Pa Caw Tix Ci


Lai Lox Kap 3:6

Can krax dee hu maix khawm uik deuh rhawm tix ka Siyiex, phan yuh nan Nawh Cao tag kieh krax hu maix rah see heue.

Siyiex Laug Ka Mose



Lai Lih Hu 1-4




Khaix hoik yum Yosiep, Pui ceu Isarilax kawn ot daux meung Ejiptux tom rheung num, tom pre haoh hun, tom hoek ju kawn saux kawn sex kix heue.



Yam hoik kied rheung num, simiang pa khraox kuang ka daux meung Ejiptux. Pui meung Ejiptux kawx hoik pi ka kaing ceu pa yuh Yosiep heue. Kix lhat ka kied haoh hun ting riang rao pui ceu Isarilax heue. Mawh kheu nan kix tawx pui ceu Isarilax yuh siliex tix heue.



Pui ceu Ejiptux ang joeng cau pui Isarilax yuh nyiex ngie cau kix sum veng, khin kix yuh kaing nu mai yeen ya ka kix heue. Viang mawh nan pui ceu Isarilax nie pon buanson khaing Siyiex mai nie pre haoh hun heue.




Mawh kheu pre haoh hun pui ceu Isarilax, simiang Pharaw tawx lox kieh pui tix pah ka can kawn nyawm simex pa keh khaing pui Isarilax khawm uik mai tik ka daux rawm klawng Nilax heue.




Yam an bun Isarilax tix kaux keh ka kawn simex tix kaux. Kiex mex moeng mox ka kawn nyawm an heue.



Khaix an kiex sau kawn nyawm an daux kreeb mai ploi daux rawm klawng Nilax mai kieh puxke nawh hawt ti jhak ka nawh heue.




Yam yaox kawn bun simiang ka kawn nyawm pa ot daux kreeb an, nawh teei ti eei heue. Nawh vai miex kawn nyawm an priex ka kawn nyawm an heue. Nawh sum ceu kaux kawn nyawm an mawh Mose heue.



Tix singaix Mose yaox pui Ejiptux pah pui ceu Isarilax yum tix kaux. Mose cuca ti taoh ka pui ceu tix Isarilax heue.



Viang Mose keud pui ang yaox ka pah tix pui Ejiptux an yum kawx, pui tix kaux yaox ka grawng an heue.



Yam mhong simiang ka grawng an simiang sawg ti pah ka Mose heue. Mose to hu daux tiag dee singai son sang luat luan tix khaing krax yum heue.



Mose lih ti mawh cao liang yung, nawh koe moeng tan mai koe kawn simex 2 kaux heue.



Tix singaix yam liang Mose yung, nawh yaox ngu gleeing ka yeem khaox. Viang mawh nan kheu nawh yaox yeem khaox an ang proe, nawh greed ti hu jhak dex heue. Yam an Siyiex ah nin,” Mose, puik kiiep maix. Kheu dah dee cung maix in mawh tiex dee singax.”



Siyiex ah nin, “Aux hoik yaox krax pa kha rhawm pui cie Aux. Aux sang ploi maix hu taoh pui ceu Isarilax luat luan khaing yuh siliex daux meung Ejiptux. Aux sang tawx haktiex Khanan ka kix awm hoik yuh Aux gumlox sijax mukheu ka Abraham, lcak mai Yakop.



Mose ah nin, “Phan pui chawk mawh pui mawx pa ploi maix hoek, aux sang deeh pawk yuh ka mawx?” Siyiex nhie Mose deeh pawk ah nin, “Aux Mawh Awm Pa Mawh Aux. Kaw Pa Mawh Aux, pa ploi aux hoek. In tag mawh ceu kaux Aux jheeng jheeng.”



Siyiex tawng Mose ang koe rhawm ti sang hu, Nawh tom tawx puxke nawh Arun hu teem ka nawh heue. Siyiex tawx lox ka Mose mai Arun grawng sang kieh simiang Pharaw kiien rhawm rhi.

K. Deeh Thawk Theng Ka Been

1. Simiang Pharaw kieh pui Isarilax yuh kaing pa tix?
2. Mawh kheu pa tix simiang Pharaw kieh pui pah ka kawn nyawm simex?
3. Kheu pa tix Mose pah pui Ejiptux tix kaux?
4. Yam liang Mose yung, nawh yaox ceu pa tix?
5. Kheu pa tix Siyiex sang ploi Mose hu meung Ejiptux?
6. Siyiex kieh pui mawx hu teem ka Mose?

Kh. Krax Pa Doh Rhawm Ka Been

1. Mawh kheu pa tix pui ceu Isarilax yaox tix yuh siliex?
2. Ka daux been in Mose koe rhawm rhi pa yuh ka mawx?
3. Kheu pa tix Siyiex koe rhawm ti sang taoh ka pui ceu Isarilax?

G. Krax Pa Deeh Shiao Daux Ju Tix Khaing Been

1. Khaix hoik yum Yosiep, pui meung Ejiptux pi awm ka buanson pa yuh Yosiep. Maix yaox jhawm kawn pui yuh ka mawx?
2. Siyiex chaox rhawm ka pui Isarilax mai nghiet ka lox riag yo kix. Siyiex hoik jhi krax chaox rhawm Tix ka maix ka daux ceu pa yuh ka mawx?
3. Siyiex laug Mose son sang taoh ka pui Isarilax. Awm an maix keud Siyiex laug ka maix son pui ceu maix lie? Maix pon yuh ceu pa tix son pui ceu maix?

Ng. Ceu Pa Rieb Gau Ex Khaing Been In

1. Siyiex koe rhawm tix teem ka ex, yam yaox krax kha rhawm.
2. Dah dee pa ot Siyiex mawh dah dee pa singax singeh, mawh kheu Siyiex mawh Siyiex pa singax singeh heue.
3. Siyiex koe akhuang tix laug shiao ka kawn pui awm pa koe rhawm Nawh.
4. Awm Siyiex tawx Arun teem ka Mose, ka daux ju ex kawx Siyiex koe rhawm ti kieh ex ralai teem ka paox tix heue.

P. Baux Lai Pa Caw Tix Ci

Yohan 15:16 (k)


Pex laug tix teei Aux ang mawh. Vaing mawh nan Aux hoik laug tix teei pex mai hoik ciak ti deuh pex, yuh ka mawh son sang hu plix pex plix mai son sang kaux cong plix pex heue.

Krax Kha Pa Tawx Siyiex

10 Ceu



Lai Lih Hu 5-10



Mose mai Arun hu ah nin ka simiang Pharaw, “Siyiex nhie maix ploi ceu pui Isarilax lih luan.” Viang mawh nan simiang Pharaw ang cu ti ploi, nyiah maong ka kiex mai nie khin pui Isarilax yuh kaing khaing bawg yam pa hoik luan heue.



Mawh kheu simiang Pharaw ang cu ti ploi pui Isarilax, Siyiex kieh krax kha rhawm hoek piang kix 10 ceu heue. Siyiex jhi grawng pa ting sibrawm Tix khaing simiang Pharaw mai khaing siyiex pa krub kix, ka daux pa kieh kix sipub krax pa kha rhawm heue.



Siyiex kieh rawm klawng Nilax mawh nham. Viang mawh nan simiang Pharaw kawn kiien rhawm heue.



Siyiex kieh khiiet naog ka daux meung Ejiptux khawm uik. Pharaw nhie Mose teei khiiet grai. Yam hoik yum khiiet simiang Pharaw baox nie kiien rhawm rhi ang cu ti ploi ka pui Isarilax.




Siyiex baox ploi maing mai prawp lih. Simiang Pharaw nhie Mose mai Arun khiox khaw ka Siyiex son sang grheu maing mai prawp mai ah ti sang ploi pui Isarilax lih hu. Khaix hoik khiox khaw Mose mai Arun ka Siyiex kieh maing mai prawp grai, Pharaw baox kiien rhawm rhi ang cu ti ploi pui Isarilax lih.




Siyiex baox kieh khawng brie khankix yum kheu caw saux preng. Pharaw kiien rhawm ang cu ploi ka pui Isarilax lih hu.



Siyiex nhie Mose tei nyaox rhuat daux bhaung sivoe ngai Pharaw. Lheu khaing pui ceu Isarilax pui ceu Ejiptux caw saux muad ku kaux heue. Viang mawh nan Pharaw ca kawn kiien rhawm rhi ang ploi ka pui ceu Isarilax.



Khaix an Siyiex kieh pre ting lih. Pre kheem khaox ox rib riem, pui mai khawng eei brie liang pa ot plak praix nyiex khankix yum heue. Pharaw nhie Mose mai Arun khiox khaw ka Siyiex son ang lai kieh pre baux lih heue.



Viang mawh nan Pharaw kien rhawm rhi ang cu ti ploi pui Isarilax lih hu khaing hoik yiien pre heue.



Mawh kheu nan Siyiex ploi sido lih daux meung Ejiptux. Sido an kix ih can ceu pa hoik sum kix pa kawn deuk khaing lih pre ting heue.



Baox khaix an Siyiex kieh meung Ejiptux vhaik 3 singaix 3 sawm. Mawh kheu kied vhaik pui Ejiptux ang lai chix lih plak praix. Viang mawh nan dee ot pui ceu Isarilax ang vhaik, mhawm rieng heue.



Viang krax kha hoek ka piang meung Ejiptux kawx simiang Pharaw ca kawm kien rhawm rhi ang cu ploi pui Isarilax lih hu. Dee ghoik Siyiex tawx krax kha pa pex tieh loh ka rhawm rhi Pharaw kheu pa kieh kawm Ai yum heue.

K. Deeh Thawk Theng Ka Been

1. Mose mai Arun hu ah pa tix ka simiang Pharaw?
2. Yam mhaing Mose mai Arun simiang Pharaw ploi pui ceu Isarilax lih luan, simiang Pharaw yuh ka mawx?
3. Siyiex kieh ceu pa tix lih mawh nham?
4. Khaix hoik kieh Mose khiet grai, rhawm rhi Pharaw yuh ka mawx?
5. Khaix hoik tawx krax kha ka maing mai prawp, Siyiex paox tawx krax kha ceu pa tix?
6. Siyiex tawx pre lih tom yuh ka mawx?
7. Mawh pa tix pa ih ka ceu pa sum pui Ejiptux?

Kh. Krax Pa Doh Rhawm Ka Been

1. Maix yaox rhawm rhi Pharaw mawh pa yuh ka mawx?
2. Maix yaox grawng pa ting sibrawm Siyiex yuh ka mawx?
3. Maix yaox yuh ka mawx ka grawng pa koe krax kha piang haktiex yam in?

G. Krax Pa Deeh Shiao Daux Ju Tix Khaing Been

1. Kheu kiien rhawm simaing Pharaw, Siyiex tawx krax kha ka piang pui meung Ejiptux. Ka daux ju maix, khaw tix koe rhawm rhi pa yuh ka mawx?
2. Siyiex jhi grawng pa ting siawp sibrawm Nawh ka piang pui Ejiptux. Ka daux ju maix Siyiex plak jhi maix yaox grawng ting siawp sibrawm Nawh ka daux ceu pa yuh ka mawx?
3. Phan maix sipub krax pa kha rhawm awm pui meung Ejiptux, maix sang yuh ka mawx lie?

Ng. Ceu Pa Rieb Gau Ex Khaing Been In

1. Siyiex ting sibrawm ka piang jhong khix mee num, praix klawng khan kix khawm uik heue.
2. Kheu krax pa ting jhawm kiien rhawm, ex kawn pui hoek krax kha heue.
3. Son sang tieh loh rhawm rhi kawn pui, Siyiex tawx krax pa kha rhawm sidiex gau ka ex heue.

P. Baux Lai Pa Caw Tix Ci

Lai Yaogyaw 91:1

Pui pa ot ka dee pa tieb tie Siyiex, Cao pa ting pa lhaong khaing khawm uik, tag sang pon tix ot ka greem veei siawp sibrawm nawh heue.


Poi Pasakha



Lai Lih Hu 11:1-10, 12



Siyiex tawx satix ka simiang Pharaw, phan ang ploi pui Isarilax lih hu Siyiex ah sang pah kawn Ai mai pa liang ti keh daux khawng brie khankix yum. Viang mawh nan simiang Pharaw baox thiang ka lox Siyiex.




Son sang taoh ka kawn Ai nyiex ma pui pa nghiit ka lox Siyiex, Siyiex nhie kix pah kawn yung pa kluing pa ang koe dee mat tix mu phan ang mawh nan pex tix mu ku nyiex ma.



Khaix an nhie kix kraix nham kawn yung phan ang mawh nan nham kawn pex ka piang nuk siviex mai pang khaox siviex khawm ra mu. Nhie kix yuh poi ih priex, tong ih nex mai ih khaox mun ang sau susaix heue. Pa hoik ih kix yuh nan jhi grawng hoik khre riien kix tix sang lih khaing meung Ejiptux.



Pui ceu Isarilax hawt ti yuh awm pa krai Siviex heue. Ka daux bo an Siviex kieh kawncaw Tix tawx krax kha ka kawn Ai cie pui Ejiptux.



kawncau Siyiex hu luan khaing nyiex ma Isarilax mawh kheu kraix kix nham ka piang nuk siviex tix heue. Mawh kheu nham kawn yung, pui ceu Isarilax pon krax luat luan heue.



Viang mawh nan pui ceu Ejiptux ang nghiit lox Siyiex. Mawh kheu nan kawncau Siyiex pah kawn Ai pui ceu Ejiptux yum ku nyiex heue.



Jah ka kawn Ai pui pa ot daux thawng tom hoek ka kawn Ai simiang Pharaw hoik yum khawm uik heue. Krax riag yo ti yiem sigrien sigre daux meung Ejiptux heue.



Simiang Pharaw kok ka Mose mai Arun nhie kix lih khaing meung Ejiptux phai phai heue. Pui ceu Ejiptux kawx nie sidiet pui ceu Isarilax lih phai phai heue.

K. Deeh Thawk Theng Ka Been

1. Siyiex tawx satix ka simiang Pharaw yuh ka mawx?
2. Siyiex nhie pui ceu Isarilax yuh pa tix?
3. Kheu ang pui Ejiptux nghiit lox, Siyiex yuh pa tix ka kix?
4. Khaix yum kawn Ai pui Ejiptux, kix yuh pa tix ka pui Isarilax?

Kh. Krax Pa Doh Rhawm Ka Been

1. Krax yum kawn Ai mai krax yum khawng brie pa liang, sang jhi ka pakpeung pa tix? Koe dee bleeh yuh ka mawx?
2. Poi ih priex, tong ih nex mai ih khaox mun ang sau susaix, koe dee bleeh yuh ka mawx?
3. Krax pa kraix nham kawn yung ka piang nuk siviex mai pang khaox siviex khawm ra mu, koe dee bleeh yuh ka mawx?
4. Krax pa cu nghiit ex ka lox Siyiex koe buanson yuh ka mawx mai krax pa ang cu nghiit koe buanson yuh ka mawx?

G. Krax Pa Deeh Shiao Daux Ju Tix Khaing Been

1. Kheu nham kawn yung, pui Isarilax hoik pon luat luan khaing krax pa yum kawn Ai. Mawh ceu pa tix pa pon taoh ju kluan ex luan khaing krax yum?
2. Ka daux been in maix pon rieb gau ceu pa tix ka son ju tix?
3. Son sang doh keud pui Isarilax grawng pa kha rhawm yam yuh siliex ka daux meung Ejiptux, Siyiex kieh kix yuh poi Pasakha. Maix sang plak jhi buanson Siyiex, Yam luat luan maix khaing krax nu krax khawm, maix sang plak jhi buanson Siyiex, yuh ka mawx?

Ng. Ceu Pa Rieb Gau Ex Khaing Been In

1. Lheu khaing nham Yesux pa mawh kawn yung Siyiex, ex ang chix pon luat luan khaing phimap.
2. Son sang pon krax taoh mai krax luat luan khaing krax yum, Yesux pa mawh Kawn Ai Siyiex kham tix yum tang ex.
3. Siyiex lheu moh kawn pui khaing tang ceu. Kawn pui mawh pakpeung Siyiex.

P. Baux Lai Pa Caw Tix Ci

Lai Mathiex 26:28

Kheu in mawh nham Aux pa dex dawd mai sijax mukheu pa khraox, pa lih son pui tom nie, son sang ploi phimap khankix heue.

